

Elordoin ez da eginen urtegirik

Auzitegiak arrazoia eman dio Elordoi Zaini eta eraikitze baimena deuseztu

Lur Berri kooperatibak arto landak ureztatzeko eraiki nahi zuen Elordoiko urtegia ez da eginen. Paueko Administrazio Auzitegiak arrazoia eman dio Elordoi Zain elkarteari, eta eraikuntza baimenak deuseztu. Elordoi Zainek gogorki salatu du hautetsien jarrera.

Hur Gorostiaga / Baiona

«ELORDOIN ez da eginen urtegirik», eman zuten atzo albistea Elordoi Zain elkarteak kideek. Elkarre horri arrazoia eman eta 1991 urtean abiatu proiektu «kario eta zentzugabekoa» bertan behera utzi du Paueko Administrazio Auzitegiak.

«Proiektuaren aurkezpena Lur Berri laborantza kooperatibak egin zuen, eta hastapenean agertu ideiak Elordoi inguruko biztanleen edateko ur horniketa zuen helburu», salatu zuten atzo Elordoi Zaineko kideek. Gaineratu zuten, «hastapenean 6 milioi liberako kostua omen zuen. Baina denbora aitzina joan ahala, gibelean zen jukutria ohartu ginen. Urtegiak ez zuen edateko uraz hornituko eta ez zen Elordoi inguruko biztanleendako izanen. Gure eskualdean hartutako ura, 24 kilometrorra nahi zuten eramane, Akamarreko eskualdera, hango laborari handien arto landen ureztatzeko. Eta ez zuen 6 milioi liberako gortua izanen, baizik eta 14 milioi liberatik gorakoa. Dirua, berriz, %100 diru publikoez finantzatu izanen zen; hots, herritarren saketetik», salatu zuten Elordoi Zaineko kideek.

Aubert Garatek, Elordoi Zaineko lehendakariak, agerian utzi nahi izan zuen hautetsien «azpikeria». «Izan ere, Jean Jacques Lasserre Lur Berriko burua eta Barthelemy Agerre Lur Berriko zuzendariordea izateaz gain, eskualdeko hautetsi garrantzitsuenak dira, eta haiek dute diru publikoez erabakitze ahalmena», adierazi zuen. «Interes orokorra zaindu ordez, hautetsi horiek beren interes pribatuak besterik ez dute begiratu», salatu zuen Jacqueline Pecassou Elordoi Zaineko abokatuak.

Paueko Auzitegiak epaian agertu bezala proiektuaz herritarrekin behar bezala kontsultatu ez izana salatu zuten Elordoi Zainekoek, bai eta 18 hektareako urtegiak ingurugiroan sortuko zuen kaltea ere.

Auzia irabazi badute ere, beste proiekturik sor daitekeela eman zuten abisu. «Azken finean, uraren antolaketa eta laborantza motaren hautua da arazoa. Artoa, inbertsio handiak eta laborari guti behar dituen laborantza intentsiboa da; beraz, laborari aberatsen esku dagoena. Gainera ur anitz behar du, bereziki gutien dagoen garaian, udan. Azkenik, subentzio gehien edaten duen kultura da. Frantzia



Elordoi aintzira artifizialaren kontrako manifestazioa, Bidaxunen.

BOB EDME

batzuk hartu beharko lirateke gisa honetako orientabideek aitzina egin ez dezaten», gehitu zuen Pecassouk.

Elordoi Zainek heldu den urriaren 11n eginen du biltzar nagusia, Donapaleuko Airetik gelan. Geroan Amikuze inguruko

etxeetara heldu den uraren kalitate eskasa hobetzeko xedea ere agertu zuten elkarteak kideek atzoko agerraldian.

Aferaren bilakaera

- ✱**1991 urria.** Jean Jacques Lasserre Lur Berriko buruak urtegi proiektua aurkeztu zuen.
- ✱**1995eko apirila.** Barthelemy Agerre kontseilari nagusia proiektuaren alde agertu zen.
- ✱**1995eko uztaila.** Elordoi Zain elkarteak sortu zen. Helburua, Donapaleu eta Ostankoa eskualdeko Elordoi ingurua defenditzea.
- ✱**1997 maiatza.** Amikuzeko herri arteko elkar-goak proiektuarekin ados zela azaldu zuen.
- ✱**1997 ekaina.** Donapaleuko Udala ados.
- ✱**1997 agorrila.** Paueko prefetak erabiltzen publikorako proiektu izendatu zuen.
- ✱**1997 iraila.** Elordoi eskualdeko lurraldeen jabeek beren lurra saldu eta, gisa horretan, desjabetze lanak zailtzea lortu zuten.

- ✱**1997 abendua.** Voynetek kexak ikusirik, Paueko prefetak bigarren agindu bat egin zuen urtegiaren eraikuntza baimentzeko. Elordoikoak afixen kolatze eta okupazioak hasi zituzten.
- ✱**1998 otsaila.** Voynet ministroak prefeturak egindako bigarren agindua baliorik gabe utzi zuen. Hala ere, lehen aginduak xutik zirauen. 200 pertsonak manifestaldia egin zuten.
- ✱**1998ko uda.** Paueko Administrazio Auzitegiak ekainean 5.000 liberako isuna ezarri zion Prefeturari bigarren eraikuntza baimenagatik. Uztailean, lehen agindua ere baliorik gabe utzi zuen. Auzitegiaren erabakia helegiteko epea asteburuan bukatu da, eta helegiterik izan ez denez, proiektua bertan behera gelditu da. ✕

Artikako errausteko labearen planari alegazioak egin dizkio Bizkaia Bizirik-ek

■ *Plataformako kideek Zabalgarbi proiektuaren aurkako protesta egin zuten atzo*

G. Agirre / Bilbo

BIZKAIA BIZIRIK plataformako kideek Bilboko Artika inguruan eraikiko duten errausteko plantaren plan bereziari egindako alegazioak entregatu zituzten atzo goizean Bizkaiko Diputazio Ingurugiro Sailan. Aldi beran, Maria Esther Solabarrieta buru duen Sailaren egoitzaren aurrean bildu ziren Zabalgarbi proiektuaren kontra protestatzeko.

Hiri hondakinak errausteko labearen plan berezi hori Diputazio Ingurugiro Sailak landu du, eta iragan uztailean kaleratu zuen. Momentu honetan, egitasmoari alegazioak egiteko epea zabalik dago, eta atzo Bizkaia

Bizirik plataformak bezala, gaur IU-EB alderdi politikoak aurkeztuko ditu alegazioak. Plataformak 2.000 alegazio pertsonal eta taldeko 25 aurkeztu zituen.

Errausteko plantaren plan teknikoak «legez kanpokoa» dela adierazi zuen Jon Torre plataformako ordezkariak. Hark esan zuenez, «hiri hondakinak kudeatzeko kompetentzia edo ardura legez Udalaren esku dago. Horregatik, Bizkaiko Diputazioak prebarikazioa egin du, berea ez den kompetentzia bat bereganatu baitu».

Illo beretik, Torrek «erabateko lotsagabekeriata» jo zuen aipaturiko plan berezi hori Zabalgarbi elkarteak abokatuak jorratu izana. «Plan berezi hori errauste-

ko proiektuarekin zerikusirik ez zuen beste abokatu batek landu behar zuen, eta ez, inolaz ere, parte den batek».

Hiri hondakin solidoen errausteko plantak ingurugiroan sortuko dituen kalteez gain, planak Euskal Autonomia Erkidegoko Lurralde Antolaketa Irizpideak eta Bilboko Hirigintza Egitasmoa hausten dituela azpimarratu zuen plataformako bozeraileak.

Plataformako zenbait kidek alegazioak aurkeztu zituzten bitartean, beste batzuk Foru Ingurugiro Sailaren egoitzaren aurrean bildu ziren Errausteko plantarik ez! zioen pankarta bati eutsiz. Kontzentrazioak ordu erdi inguru iraun zuen. ✕

Antton Jaime:
«Etxegarate eta Eibar-Gasteiz legealdia bukatu aurretik hasiko ditugu»

■ *Etxegarateko bikoizketaren hirugarren fasearen berri eman zuten atzo*

Asier Errasti / Donostia

ETXEGARATEKO bikoizketa eta Eibar-Gasteiz autobideko proiektuak aurrera doaz. Etxegarateko bikoizketako kasuan lehen fasea —Idiazabalgo saihebidetako dagoeneko egin dago, eta bigarrena —saihebidetik mendatearen magaleraino doana— hurrengo urterako egongo da bukatuta, Antton Jaimek atzo azaldu zuenez. Hasi gabe dagoen hirugarren faseari dagokionez —Nafarroako mugara bitartekoa—, oniritzia eman zion asteartean Gipuzkoako Diputazioak. Gauzak horrela, Antton Jaime Gipuzkoako Garraio diputatuak atzo Donostian azaldu zuenez, «Etxegarate eta Eibar-Gasteizko obrak legealdia bukatu baino lehen hasteko konpromisoa daukagu». Jaimek argitu zuenez, bi lan horiek batera egiteko asmoa dauka.

Gipuzkoako Diputazioak onartutako Etxegarateko bikoizketaren inguruko argibideak ematerakoan, proiektuaren hirugarren faseak 9.181.000.000 pezetako aurrekontua duela eta Nafarroako muga eta Idiazabal hegoaldeko lotunearen artean 8.454 metroko errepidea egingo dela azaldu zuen Jaimek. Lehen zatian, Nafarroako mugatik hasita, bide berria eta zaharra batera joango diren arren, Etxegarate gainera iritsi aurretik bi bideak banandu egingo dira. Ondorioz, oraingo galtzada Gasteiz aldera joateko bakarrik erabiliko da, eta errepide berriak Idiazabal aldera jaisteko balioko du. Bide berriarekin batera, Etxegarateko gainean eta Ursuaren auzunerako sarreran lotura bana ere egingo da.

Bi proiektuak batera ■ Etxegarateko proiektua dagoeneko onartua dagoenez, urtea amaitu aurretik edota datorrenaren hasieran adjudikatuko dira lanak. Etxegarateko obrarekin batera, Eibar-Gasteiz autobideko lanen lehiaketak publikoak ere egingo du Diputazioak, bi lanak epe berean ateratzeko aurrera. Horrela, hurrengo urteko aurrekontuak onartzearekin batera, bi obrak lehiaketak publikoak egingo dira. Etxegarateren kasuan, lanak 2002 urterako bukatuak egotea espero da, eta ordurako Nafarroako Diputazioak ere egin izango du bere zatia. ✕